

Pregled Dokumentata| Broj 11/21

Početna (/) / Dokumenti (/Docs/) / Službene novine Kantona Sarajevo (/Docs/Drzavni) / Dokumenti pregled

Službene novine Kantona Sarajevo, broj 11/21

Na osnovu člana 15. Zakona o principima lokalne samouprave u Federaciji Bosne i Hercegovine ("Službene novine Federacije BiH", broj 49/06 i 51/09), člana 25. Statuta Općine Centar Sarajevo - Prečišćeni tekst ("Službene novine Kantona Sarajevo", broj 23/04) i člana 171. Zakona o socijalnoj zaštiti, zaštiti civilnih žrtava rata i zaštiti porodice sa djecom ("Službene novine Kantona Sarajevo" broj 38/14 - Prečišćeni tekst, 38/16, 44/17 i 28/18), Općinski Načelnik donosi

PRAVILNIK

O KRITERIJIMA I RASPODJELI NOVČANIH SREDSTAVA ZA DODJELU JEDNOKRATNE NOVČANE POMOĆI LICIMA U STANJU SOCIJALNE POTREBE

Član 1.

(1) Ovim Pravilnikom o kriterijima i raspodjeli novčanih sredstava za dodjelu jednokratne novčane pomoći licima u stanju socijalne potrebe (u daljem tekstu Pravilnik) uređuju se kriteriji i način dodjele jednokratne novčane pomoći licima u stanju socijalne potrebe.

(2) Jednokratna novčana pomoć ostvaruje se jednom u toku kalendarske godine.

Član 2.

(1) Socijalnom potrebom u smislu zakona smatra se trajno ili privremeno stanje u kome se nalazi određeno lice ili porodica, prouzrokovano ratnim događajima, elementarnim nesrećama, opštom ekonomskom krizom, psihofizičkim stanjem pojedinaca ili drugih razloga, koji se ne mogu otkloniti bez pomoći drugog lica.

(2) Cilj pružanja novčane pomoći na osnovu ovog Pravilnika je približno dostići minimalnu materijalnu sigurnost i nezavisnost pojedinca i porodice u zadovoljavanju osnovnih životnih potreba.

Član 3.

(1) Poslove u vezi ostvarivanja prava propisanih ovim Pravilnikom obavlja općinska služba nadležna za poslove socijalne zaštite.

(2) Provjeru stanja socijalne potrebe vrši socijalni radnik službe izlaskom na teren, što podrazumijeva lični uvid u socio-ekonomske prilike domaćinstva, prikupljanje socio-anamnestičkih podataka i izradu socijalne anamneze.

Član 4.

- (1) Sredstva sa budžetske pozicije predviđena za ove namjene dodjeljuju se na osnovu javnog poziva koji se objavljuje na web stranici Općine i ostaje otvoren do kraja tekuće budžetske godine ili do utroška planiranih budžetskih sredstava.
- (2) Jednokratna novčana pomoć utvrđena ovim Pravilnikom dodjeljivat će se na osnovu podnesenih zahtjeva, a u skladu sa objavljenim javnim pozivom.
- (3) Zahtjevi za ostvarivanje prava na jednokratnu novčanu pomoć podnose se službi nadležnoj za poslove socijalne zaštite putem protokola Općine.
- (4) Zahtjevi će se rješavati po redosljedu podnošenja.
- (5) Služba je dužna u roku od 30 dana od dana podnošenja riješiti zahtjev i o tome obavijestiti podnosioca.
- (6) Dokumentacija koju je potrebno priložiti uz zahtjev po objavljenom Javnom pozivu biti će navedena u posebnom obrascu koji će biti dostupan na web stranici te info-pultu Općine Centar Sarajevo. Zahtjev za ostvarivanje prava čini sastavni dio ovog Pravilnika i isti se može mijenjati neovisno od odredaba Pravilnika.

Član 5.

- (1) Licima u stanju socijalne potrebe, pod uvjetom da ukupna primanja porodičnog domaćinstva ne prelaze iznos od pola prosječne plaće ostvarene u FBiH prema posljednjim statističkim pokazateljima, smatraju se:
 - a) Korisnik stalne novčane pomoći, korisnik tuđe njege i pomoći i lične invalidnine ostvarene putem Službe socijalne zaštite - Kantonalnog centra za socijalni rad;
 - b) Osobe s posebnim potrebama, osobe nesposobne za samostalan rad,
 - c) Korisnici dodatka na djecu,
 - d) Stara, bolesna i iznemogla lica starosti preko 60 godina,
 - e) Porodilje koje nisu u radnom odnosu u periodu ostvarivanja prava na porodijsku naknadu,
 - f) Penzioneri sa minimalnom penzijom,
 - g) Lica iznad 50 godina starosti koja su nakon dugogodišnjeg radnog staža ostali bez zaposlenja,
 - h) Lica koja uslijed nelikvidnosti firme nisu ostvarila pravo na lični dohodak u posljednja tri mjeseca do dana podnošenja zahtjeva,
 - i) Lica u čijem se porodičnom domaćinstvu svi punoljetni članovi nalaze na evidenciji Službe za zapošljavanje
- (2) Nadalje se licima u stanju socijalne potrebe, pod uvjetom da ukupna primanja porodičnog domaćinstva ne prelaze iznos od jedne prosječne plaće ostvarene u FBiH prema posljednjim statističkim pokazateljima, smatraju:
 - j) Samohrani roditelji čija djeca nemaju navršениh 27 godina života, a koji su korisnici dodatka na djecu;
 - k) Porodice u kojima se jedan član domaćinstva liječi od teške bolesti,
 - l) Lica koja se nađu u stanju socijalne potrebe u slučaju smrti člana užeg porodičnog domaćinstva,
 - m) Djeca bez oba roditelja ili djeca bez roditeljskog staranja do navršениh 27 godina života.

Član 6.

Uvjeti za ostvarivanje prava utvrđenih ovim Pravilnikom su:

- a) da podnosilac zahtjeva ima prebivalište na području općine Centar Sarajevo u trajanju od najmanje jedne godine do dana podnošenja zahtjeva ili boravište po osnovu statusa raseljenog lica;
- b) da je podnosilac zahtjeva lice u stanju socijalne potrebe definisano članom 5. ovog Pravilnika;
- c) da nitko od članova zajedničkog domaćinstva podnosioca zahtjeva nije vlasnik preduzeća ili samostalne radnje ili ima registriranu dopunsku djelatnost;
- d) da nitko od članova porodičnog domaćinstva podnosioca zahtjeva nije ostvario drugi vid jednokratne novčane pomoći iz nadležnosti Službe za boračko-invalidsku, socijalnu zaštitu i društvene djelatnosti.

Član 7.

Pravo na jednokratnu novčanu pomoć mogu ostvariti i lica za koja nadležna služba utvrdi da ne spadaju ni u jednu od kategorija navedenih u članu 5. ovog Pravilnika, ali da se ipak uzimajući u obzir cjelokupnu situaciju utvrdi da se nalaze u stanju socijalne potrebe, a na osnovu detaljne socio-anamnestičke obrade stanja porodičnog domaćinstva.

Član 8.

(1) Lica u stanju socijalne potrebe mogu ostvariti pravo na jednokratnu novčanu pomoć u maksimalnom iznosu do 700,00 KM i to kako slijedi:

- a) domaćinstva do dva člana u iznosu do 200,00 KM
- b) domaćinstva do četiri člana u iznosu do 300,00 KM
- c) domaćinstva preko četiri člana u iznosu do 350,00 KM

(2) Na osnovu detaljne socio-anamnestičke obrade stanja porodičnog domaćinstva, iznos jednokratne novčane pomoći utvrđen stavom (1) ovog člana u konkretnom slučaju može biti uvećan do 100 %, u zavisnosti od utvrđenih otežavajućih okolnosti koje dokazuju veći stepen stanja socijalne potrebe a to su: materijalni status, radna sposobnost, starosna dob, stepen invalidnosti, vrsta bolesti, prestanak rada, uvjeti stanovanja i sl.

Član 9.

Ukoliko bude postojala opravdana sumnja da se sredstva jednokratne novčane pomoći neće adekvatno iskoristiti Općinski načelnik može, a na prijedlog i uz detaljnu socio-anamnestičku obradu službe, iznos jednokratne novčane pomoći utvrđen članom 8. ovog Pravilnika umanjiti za 50 %.

Član 10.

Ostala prava

Ostala prava u smislu ovog Pravilnika koja mogu ostvariti lica u stanju socijalne potrebe su:

- a) Pravo na plaćanje troškova smještaja za domaćinstva u stanju socijalne potrebe koja nemaju riješeno stambeno pitanje, a čija ukupna primanja ne prelaze visinu prosječne plaće u FBiH prema zadnjim statističkim pokazateljima, pod uvjetom da posjeduju ovjeren ugovor o podstanarskom odnosu ili izjavu o podstanarskom odnosu vlasnika/posjednika stambenog prostora (u izuzetnim slučajevima ovjerena izjava podstanara). Novčana pomoć za plaćanje troškova smještaja utvrđuje se u odnosu na okolnosti svakog konkretnog slučaja i dodjeljuje se u iznosu do 200,00 KM mjesečno, a u maksimalnom iznosu do 1.200,00 KM u toku kalendarske godine.

b) Pravo na plaćanje troškova dženaze - sahrane - ukopa, lica u stanju socijalne potrebe koja ovo pravo ne mogu ostvariti na drugi način. Po Narudžbi ove službe nadležna institucija dostavit će fakturu za troškove ukopa koja će se isplatiti u roku do 7 dana od dana dostave.

c) Pravo na plaćanje užine učenicima osnovnih škola čiji se roditelji nalaze u stanju socijalne potrebe, a evidentirani su kao korisnici dodatka na djecu, isplaćivat će se mjesečno u iznosu do 20,00 KM po učeniku na osnovu spiskova osnovnih škola sa područja općine Centar Sarajevo koji se provjeravaju od strane socijalnog radnika nadležne službe. Osnovne škole su u obavezi spiskove učenika dostaviti najkasnije do 30.09. tekuće godine.

d) Pravo na plaćanje užine u iznosu od 30,00 KM po učeniku za štíćenike KJU "Dom za djecu bez roditeljskog staranja" koji pohađaju srednje škole.

Isplata jednokratne novčane pomoći iz prethodnog stava vršit će se na osnovu dostavljenog spiska od strane ustanove putem nadležne službe za finansije na tekući račun KJU "Dom za djecu bez roditeljskog staranja".

Član 11.

(1) Ukoliko se iz priložene dokumentacije ne može utvrditi da li podnosilac zahtjeva ispunjava uvjete iz člana 5. ovog Pravilnika, nadležna služba može po službenoj dužnosti tražiti i dodatnu dokumentaciju.

(2) O podnesenom zahtjevu nakon utvrđenih činjenica, prijedlog i mišljenje daje služba, a Zaključak o dodjeli jednokratne novčane pomoći donosi Općinski načelnik.

(3) Ukoliko se utvrdi da nisu ispunjeni uvjeti za ostvarivanje prava na novčanu pomoć u skladu sa odredbama ovog Pravilnika, podnosilac zahtjeva će o tome biti obaviješten aktom nadležne službe.

Član 12.

Pripadnici boračke populacije mogu ostvariti pravo na jednokratnu novčanu pomoć u skladu sa kriterijima ovog Pravilnika pod uvjetom da isto pravo nisu ostvarili putem Odsjeka za boračko invalidsku zaštitu Općine Centar.

Član 13.

Izuzetno od odredaba ovog Pravilnika, Općinski načelnik može inicirati dodjelu jednokratne novčane pomoći u maksimalnom iznosu do 350,00 KM u slučajevima kada smatra da je neophodno pomoći određeno lice ili porodicu.

Član 14.

Izuzetno od odredbe člana 1. stav (2), Općinski načelnik može na prijedlog nadležne službe, koji se temelji na detaljnoj socio-anamnestičkoj obradi stanja porodičnog domaćinstva, jednokratnu novčanu pomoć istom licu ili porodici dodijeliti dva puta godišnje, ukoliko se utvrdi da se podnosilac zahtjeva nalazi u veoma teškim socio-ekonomskim prilikama koje se ne mogu otkloniti bez pomoći drugih lica.

Član 15.

(1) Isplata jednokratne novčane pomoći licima u stanju socijalne potrebe vršit će se putem nadležne službe za finansije uplatom na tekući račun korisnika usluga.

(2) Lica koja ostvare pravo na jednokratnu novčanu pomoć u skladu sa odredbama ovog Pravilnika u toku kalendarske godine u kojoj su ostvarili to pravo putem nadležne službe ne mogu ostvariti i pravo na dodjelu stalne novčane pomoći

penzionerima i licima preko 60. godina bez primanja.

(3) Korisnici prava na jednokratnu novčanu pomoć obavezuju se da do kraja tekuće budžetske godine u kojoj su ostvarili pravo dostave original ili ovjerene kopije fiskalnih računa na osnovu kojih se može nedvojbeno utvrditi da su putem dodijeljene pomoći zadovoljili određenu ekzistencijalnu potrebu. Prava iz člana 11. ovog Pravilnika pravdaju se odgovarajućim uplatnicama, izjavama ili fakturama.

(4) Korisnici koji ne budu u naprijed utvrđenom roku opravdali dodijeljena sredstva ista će biti u obavezi vratiti na račun Općine Centar Sarajevo najkasnije u roku koji će biti utvrđen posebnim aktom, u suprotnom će se sredstva potraživati putem nadležnog suda.

Član 16.

Ovaj Pravilnik stupa na snagu narednog dana od dana objavljivanja u "Službenim novinama Kantona Sarajevo", a isti će biti objavljen i na Oglasnoj ploči i web stranici Općine Centar Sarajevo.

Član 17.

Stupanjem na snagu ovog Pravilnika prestaje da važi Pravilnik o raspodjeli novčanih sredstava za dodjelu jednokratne novčane pomoći licima u stanju socijalne potrebe broj: 10-49-1349/17 od 24.05.2017. godine, Pravilnik o izmjeni Pravilnika o raspodjeli novčanih sredstava za dodjelu jednokratne novčane pomoći licima u stanju socijalne potrebe broj 09/B-14-1976/19 od 13.05.2019. godine i Pravilnik o dopuni Pravilnika o raspodjeli novčane pomoći licima u stanju socijalne potrebe broj 09/B-11-52/20 od 30.01.2020. godine.

Broj 10-03-45/21
04. marta 2021. godine
Sarajevo

Općinski načelnik
Srđan Mandić, s. r.

Hvala što ste naš pretplatnik. Koristite pogodnosti koje dobijate pretplatom.

O nama

Javno preduzeće Novinsko-izdavačka organizacija SLUŽBENI LIST BOSNE I HERCEGOVINE. Sva prava pridržana. 2014

Adresa